

四庫全書

集部

欽定四庫全書

鄱陽五家集卷三

鄱陽史簡編

宋黎廷瑞芳洲集三

七言古風

南北舟

東流滔滔江似箭  
南船掛帆北船羨  
陰雲黯黯天色變  
北船槌鼓南船怨  
焚香釀酒爭祝願  
一望風長一祈轉

世間萬事無兩便龍伯應酬母乃倦龍伯應酬如已倦  
祇遣澄江淨如練

二陶

清言灑灑南華玄淨社濟濟東林禪一陶運甓不揮塵  
一陶採菊不種蓮愛惜分陰樹志業盤礴千載希聖賢  
吾評東晉人物數惟有二陶真卓然

飲芝山分韻得草字

漠漠輕陰送幽討梅柳之間春正好萬古燒痕青未了

一片湖光白如掃永懷雨露涵三秀頗恨風塵遮五老  
松根嘯咏欲忘歸可惜長瓶卧芳草

探梅

山中歲晚甘恬澹花史時時聞校勘天街未省薇藥貴  
塵世頗嫌桃李濫南枝相見眼獨明東風久要交非暫  
長意孤山訪突兀徑度平湖浮碧紺暗香疎影夜濛濛  
半樹橫枝春淡淡琥珀濃傾酒拍船珠璣亂唾詩成檐  
畫角吹寒淒別語青衣天晚生孤憾

偕仲退周南翁登曲島山分韻得曲字

吳子精悍錦滿腹周郎英妙人如玉凌晨樽酒惜分攜  
飛鞚聯翩相趁逐積雨新晴馬氣驕振鬣長鳴踏平陸  
村南村北楓葉赤高田低田麥苗綠坡陀磊落如培塿  
一島軒然立於獨平生夢寐千仞岡第取愜心那計足  
迢迢鳥道入青天杳杳鐘聲出喬木遙觀疑雪復疑石  
稍動始知樵與牧傳聞隋代高隱君避世曾茲結茅屋  
李苑楊枯了不聞坐擁玉書林下讀靈君冠劍從飛龍

雲雨蒼茫手翻覆瓢中但出是豐年何惜穿厓懸一瀑  
早歲禱雨多驗然山  
無泉常汲水山下  
毳虫自得食松訣一掃四山寒翠

禿天根突兀有孤梅道氣昂藏自修竹回看下界暗黃  
塵蟻蛭蜂房幾陵谷山空鳥啼塵慮絕天寒日暮歸心  
速會當擺落悠悠談八極神遊縱吾目玉井蓮花十丈  
開瑤池桃子千年熟廓然天地覩方圓豈但山川見紆  
曲已呼鸞鳳作先導歲晚期君兩黃鵠

甲午孟夏祝公輔道過山中遂偕如上饒赴孟史

君之約至萬村阻水卧樓上共談已丑同舟雁  
汊遇風之苦明日水退途中得長句呈公輔

南山有田不歸種大瓠落無所用遂令沉沉走長江  
萬里艱危憶君共嘗疑公佩延平劍

公輔延平人

引得九淵

龍子關雁汊渡頭鑒北風真是脫身入鮓甕當時意氣  
孟溟渤笑殺篙師窮欲慟千金之子不垂堂默坐沉思  
還自痛歸來結屋萬山中手植桃花欲成洞敲門者誰  
吾故人色筆熒熒如彩鳳連宵劇談山月落一浣胸中

塵土空忻然共駕赴幽期滿路薰風入吟諷萬村孤館  
明旦潔浴罷桃笙玉壺凍神君謁帝愁晝熱夜半騎鯨  
不施鞵偷決銀河灌火輪玄化陰機神籙弄小溪如綫  
不自容更奈亂流趨者衆劃爾掀波似轉雷居然入室  
如流汞須臾便恐化桑田咫尺還憂沒茅棟絕憐榻上  
閒蛙通安得天邊明蟬螗午樓歌枕聽濤聲喚醒六年  
淮海夢青山淡淡坐神馳白鷺悠悠空目送明朝水退  
得新晴兩鳥故應天所縱乃知處險自有道一靜可以



該百動橫石斷橋沙逕曲蒼藤翠木煙霏重小車穿壁  
我徐行瘦蹇涉流君自控狂遊滿眼驚俗輩疲役回頭  
慙僕從倩誰寫作山行圖持似衡湖作清供

孟侯號衡湖居士

有邀余游中原者余以親老辭王子賢未知來錢  
別并示所和陳君人生貴適意五詩敬次韻奉

謝 今錄二首

有客六轡濡且均要我共看中都春孔林喬木故無恙  
首陽高風應未泯亦知江山不負我政恐風塵能浣人

故友貽書復相過但祝自愛千金身

飛電歛然度天隙百歲能堪幾行役遊子來歸意恐遲  
大人幸在何辭白風濤念爾去何之日暮憐渠行故逆  
世間步步是危機綿上可畊聊自適

贈姜卜隱

君家鼻祖礪溪釣何人為卜非熊兆君是礪溪幾代孫  
無人卜君君卜人自言避世歸人境焚香下簾清晝永  
豈無龍韜老渭濱英雄自昔多沉淪倘有獵者從君卜

但說後車富狐兔

丙申上元喜晴孤坐懷舊二十韻

少年意氣凌嵩華尚記京城逢午夜璧月瓊枝彩鳳飛  
銀花鐵鎖金鰲跨樓臺上下沸笙韶巷陌東西暗蘭麝  
擣蒲百萬不供擲美酒十千寧論價狂遊但恐星河曙  
醉卧不知風露下悠悠人世半悲歡忽忽天時更代謝  
蟻國驚心城郭非屢樓轉眼煙雲化微生幸爾脫干戈  
暮年聊此依桑柘每當佳節強逢迎忽思往事還驚詫

新年半月雨不止此夕一晴天所借草市簪簪村鼓鬧  
竹簷爛爛華燈掛顛狂社舞喧戲劇落魄儒冠寄嘲罵  
亦知陋俗多浮薄尚喜疲氓少閒暇先生清坐懶出門  
諸少並遊惟守舍雖無畫燭千炬圍猶有殘梅一枝亞  
孤燈隱隱耿相照疎影離離淡如畫劃爾喧風撲短檠  
炯然霽月明虛榭百念無營冷似灰一閒有味甘如蔗  
已拚暮境漁樵侶獨憶平生詩酒社白雲靄靄隔江山  
可惜無人談舊話

烏沙夾阻風

黃沙滿江日色薄北風吹天雲欲落魚龍賈勇氣凌人  
八月海風無此惡書生性命可輕試拏舟早傍沙灣泊  
崖我萬里下水船槌鼓張帆無奈樂篙師瘦坐攢兩眉  
羨彼何速嗟我遲玄冥行權故應爾速何足喜遲何悲  
一年三百六十日須有一日順風時乘流遇坎姑聽之  
濤山雪屋方堪詩

春鉏行

有鳥有鳥鳴春鉏雪衣楚楚清且癯茫然跂立奚所須  
蹄涔之中伺遊魚遊魚所得能幾何鷗鷺同儔失已多  
若非區區營一飽如此風標豈不好

彭蠡阻風

玄雲如壘沙如箭陽侯擊鼓飛廉扇穹龜帶甲魚負劍  
萬怪騰空助龍戰廬君玉立金芙蓉笑我塊坐如樊籠  
子胡不來此山中與子跨鶴蓬萊宮江流茫茫去不息  
嗟我掉往何終極靈君如願倘可乞但覓金丹生羽翼

壬戌正旦日蝕值陰有詩明日雨微雪再賦

艷娥煽妖悖且饕雲師圍之騎周遭飛廉暗鳴挾箭號  
萬鼓動地助戰鏖吳剛棄斧北且逃扶桑君還騎巨鰲  
銀蜍腹聚流清膏玉兔顙折飛白毛蒼茫殺氣橫四郊  
凍鳶無語飢鴻噉紫皇第功封二豪汝馬可歸弓可橐  
黃道肅穆君請邀黔首顙顙光勿韜願駕丹轂揚錦旄  
疾驅六龍升海濤五色爛爛中天高衣披水子絳錦袍  
葵心不寧憂忉忉矯首東方歌楚騷

朱可紹去秋許樓觀明年夏當見寄今及期矣輒  
以詩請

寥陽宮殿老夜叉九頭獐獐髮髻髻朝暮拔本不滿數  
謫守鳳山山下花

鳳山可紹先公  
穆陵王尚書堂

忽生蟻虱若魚子秋

風透頂櫛復爬夫君豈鬻居士屨履聲漢代尚書家不  
嫌汝髮污我趾結鞋遠勝蕭與麻煌煌火輪照萬野恨  
不赤腳踏雪車世間襴襤獨何事黃塵沒髀汗透鞵老  
夫兩鬢亦蕭颯謝去相帽便烏紗願言得此稱輕爽宿



諾今已期及瓜誓當布襪從此始上下雲門還若耶

聽山中談虎賦二章

雙坡山有農民陳其姓自言采樵日晚逢虎於  
衢相去無百步虎危坐時掉尾逃之不可遂再  
拜祈命虎熟視徑去又常年稻熟時野蠹千百  
為羣所至一空虎至則羣去然不無食人犬豕  
也

樵夫山下日將暮忽逢飢虎在中路目光如炬齒如霜

舉頭為城腹為墓偷生無計就死難再拜祈哀號且訴  
我貧且老孤無兒瘦骨幾何君勿悞垂頭兀坐欲有問  
歛爾翻身入雲霧君不見悍吏捉人吮甘膏千拜萬拜  
不可逃

東村西村稼如雲欲獲未獲黃紛紛鼠牙雀喙不可算  
奈此野蕪千百羣田頭結舍坐霜夜敲犁擊杵聲相聞  
五更一刻少困怠終歲舉室空辛勤近日南山老虎至  
野蕪畏之俱遠避遂令一枕得安眠犬豕時時亦遭噬

嗚呼犬豕所噬能幾何野蕪不去為害多

松風

流水渡澗秋泠泠怒濤拍天風雨驚鸞鵲  
龍吟虎嘯愁太陰連山遍野流空明飄飄  
音樂張洞庭彈璫鼓簧吹雪笙拊石擊磬作  
天鈞忽然昭文不鼓琴幽幽又作吟風箏  
問童何如睡不應起視月落天河傾乃知  
虛皇集萬靈風伯起舞蒼穹伶世間鄭衛  
聊足聽久笑舞此蓬萊音傳伯技癢不可  
禁篝燈起誦離騷經

贈王秀翁

君挾青囊枕中寶別我去行千里道淮南小山訪松桂  
湘江極浦尋芳草侯王有種從何來富貴在天非可禱  
倘遊海上遇安期歸來遺我如瓜棗

鐵笛行贈丁雲屋

斗牛之墟有伏龍寶氣夜起天為虹雷公往矣不再逢  
潭底高卧吟秋風忽羞珠宮薄且闕返形化作紅爐雪  
背負七星雷吐舌五色石墮天驚裂何人攜此過武亭

真仙東遊弭節聽知音千載空翠屏猿啼鬼哭煙冥冥  
華表雲深鶴一隻渺渺孤吟空八極左呼廬阜老仙客  
右呼西風古禪伯江上暮雲寒蕭蕭梅花未動飄葉凋  
紅尾鳳凰飛翠霄好去瑤臺吹玉簫

上奚宣慰冰壑

書生於世無所用歲晚東陵瓜自種幾度騎驢欲出門  
青松遶舍雲扃洞枕書高卧綠陰中何許清風驚午夢  
始知絳節下丹霄左驂麒麟右鸞鳳行行原隰廣咨詢

歷歷閭閻摩疾痛懸崖絕壁冰照壑白晝青山雷欲凍  
神姦畏景那敢見肯綮逢刀無不中范滂太守使令懾  
楊綰入相朝野頌每繙圖史想斯人常恨寥寥千載空  
水見黃河山大華不識歐陽當自詠振衣扶策候轅門  
秋意欣然云走送願調梅鼎作商霖老我荒園日抱甕  
長短句

啄木辭

木鬱鬱兮有靈生之穴冥冥兮木窳以委皇賁于鴛兮

厥服孔儀往伺于木兮爾喙爾夷朝于木癭兮莫于木  
枝蠹宿于根兮而鴛不知厦將墮兮其何以支

久旱得雨連陰彌旬農者云復宜得數日晴作二

龍行

赤龍推車出暘谷欲將燭光燒却珊瑚屋黑龍奮怒起  
天池欲倒海水浸却扶桑枝黔黎代為黑龍訴帝命赤  
龍且回馭已欣膏澤沃焦塵復畏連陰起寒霧地裂不  
補難望秋天漏不補亦可憂我願二龍行天各一日水

火停齊萬寶畢

送鶴神

農夫相傳鶴神之屬三千若登天度歲則民有  
糧在地則否故作此以送之

玄裳兮縞衣紛爾乘兮遄歸嗟我眊兮苦復苦穀懸于  
天兮麥在土爾之族兮類且多蠶爾食兮如眊何眊之  
憂兮來年眊爾天爾田天崇崇兮有康皇之漿兮可飲  
樂莫樂兮爾還勿復來兮人間



飲酒樂

羊祜折臂為三公英布之相黥而王富貴真可愛體膚  
不敢傷劉安升天守都厠長房學道須食糞神仙誠可  
慕臭穢那可近駟馬高蓋未易求水銀黃金況難信我  
亦不願承明廬我亦不願蓬萊山但願鰕鰖畊田間種  
秫釀作九霞丹秋風兩鬢不須綠日飲時可朱吾顏山  
花山鳥自歌舞醉聽松風牢掩關用世之士笑我拙出  
世之士憐我頑冕裳不著雖共蓑笠老露霓易過安得

歲月還那知我復笑爾還爾憐千秋之後高臺曲池在  
何處六鰲之側岱嶼員嶠俱深淵茲論猶日茫昧然華  
亭鶴唳欲聽不可得單豹遇虎所養安得全唯有飲酒  
之樂不可言所以達士不與醒者傳

鵬飛操

朝吾發兮海溟夕吾抵兮天門鱗脫軀兮欲蛻翮之起  
兮如雲濤山湧兮雪浪駕天風兮浩蕩霓掩映兮霞蒸  
條橫飛兮徑上龍樓余兮鳳來迎帝下觀兮環珮鳴逍

遙遊兮既極澹河漢兮無聲河漢無聲兮有意誰知之  
兮漆園吏桐之孫兮吏之魂吏不語兮孫能言忘言兮  
且止極吾思兮隱几春風菲菲兮杏壇花春服翩翩兮  
沂水涯聊徜徉兮稅駕奚必之兮南華

精衛行

微禽負大耻勁氣橫紫冥口銜海山石意欲無滄溟滄  
溟茫茫雲正黑濤山峩峩護龍國假令借爾秦皇鞭驅  
令石頭填不得布囊盛土塞江流孫郎覽表笑不休勞

形區區讎浩渺志雖可尚難乎酬蓬萊有人憐爾苦勸  
爾休休早歸去精衛精衛我亦勸汝歸滄海自有變作  
桑田時

泊淮岸夜聞鬼語

北風行平林蘆葉響乾雨青燐走平沙獨夜鬼相語沉  
吟乍幽咽怨哭倍酸楚遺鬢烏鳶飽滯魄狐兔伍白骨  
委飛霜零落從草莽草死東風吹復生骨枯東風吹不  
榮汝悲信悲不足詰吾欲詰爾爾試聽君不見劉項割

鴻溝又不見孫曹戰赤壁回頭萬事曉雲空石馬荒荒  
土花碧世間倘有長生藥薊子白雲丁令鶴霸城相見  
悲銅狄華表歸來嘆城郭汝不見興與衰又不憂寒與  
飢濠上之叟不汝欺汝有至樂爾不知嗚呼人生何苦  
爾何樂人生羨汝不可學

禽言四首

戊子作

布穀布穀十家九家逃亡屋去冬屯田買牛到黃犢今  
春軍需剥皮共食肉無牛可畊休論飯秋糧要米從何

辦布穀布穀奈爾何江南漸少淮南多

不如歸去歸去故鄉不是無畊處爾獨胡為在中路子  
規子規爾不自勸何用勸我為我懷我室更欲歸爾歸  
漂搖何所依

麥飯熟快活半年忍飢待此麥問汝快活能幾時更有  
五月六月飢亦所不辭且願休王師

提壺盧沽美酒烹肥豕剪新韭琵琶胡姬玉纖手清歌  
嫋嫋鶯囀柳尊前勸我千萬壽君不見東家逃亡西家

金定四庫全書  
卷三  
走惟我臺上集親友明日得似今日否酒盡無盡盡再  
沽喚僕夫提壺盧

贈古泉相士

土階章韶風日美巢父不聽却洗澗中水象犀滿山珠  
塞淵棄不之顧但酌嶺外泉嗚呼千丈之渾泥數斗一  
滴清冷空宇宙古人今人同此耳與口古泉眼中見有  
相似二君不我亦有耳但願聽松風有口只飲酒

禽言

朝看花滿枝暮見花辭樹東風翻覆手驟開驟落無憑據不如歸去不如歸去

萬疊青山白雲何處行不得哥哥哥哥冥冥高飛憂網羅  
斃斃孤往虞干戈江湖蛟鱷擾山谷虎狼多行不得哥哥  
哥哥不信時哥但知去到前頭無去處

題孫方叔石泉亭

君不見山上石可以搯明堂而柱宣室又不見石上泉可以  
蘇大旱而致豐年君隱非山隱於市安有萬丈蒼崖千丈



水自言掇拾累嶢巖更復停瀦引清泚朝霏淡淡苔蘚生暮  
雨瀟瀟蛙黽喜餐松啖栢吾齒可以礪譽堯非桀吾耳可  
以洗君家鼻祖子荆子千年家法應如此一丘一壑真自足  
坐守風煙終局促欲友子駕兩黃鵠香爐峯頭看飛瀑

贈堪輿家楊生

楊子逐貧不去楊仙救貧便富始知方技可發身不信  
儒冠真誤人生出揚枝枝幾葉青囊世世能傳業祇今  
四海貧士多我救無術可奈何蒼梧雲去天亦老會稽

穴沒生秋草但願沉冥了歲年江南何地出酒泉

送方此山歸盤中

渴不飲盜泉水熱不栖惡木陰飛蚊營營蚋漫漫掇拾  
餘醞搜殘斟祝融老子亦忘劇于君大是相知音娛娛  
炎埃塲遺以清風林蒼藤老樹覆林礪芸夫綸叟時相  
尋太虛茫茫納宇宙雲來雲去初何心送君盤中居且  
作盤中吟雙溪渡頭一笑去落日孤舟秋水深

詩餘

題項羽廟

大江東

鮑魚腥斷楚將軍鞭虎驅龍而起空費咸陽三月火鑄  
就金刀神器垓下兵稀陰陵道隘月黑雲如壘楚歌闋  
發山川都姓劉矣 悲泣呼醒虞姬和伊死別雪刃飛  
花髓霸業休休騅不逝英氣烏江流水古廟顏垣斜陽  
老樹遺恨鴉聲裏興亡休問高陵秋草空翠

元旦 蝶戀花

蜜炬瑤霞光鷓酒翠栢紅椒細剪青絲韭且勸金樽千

萬壽年時芳夢休回首  
小雨輕風寒滿袖下却簾兒  
莫遣梅花瘦萬點鵝黃春色透玉簫吹上江南柳

金陵懷古

八聲甘州

恨巨靈多事鑿長江銷沉幾英雄恨烏江亭長天機輕  
洩說與重瞳更恨南陽畊叟攬掇紫髯翁一彈金陵土  
戰虎爭龍杯酒鳳凰臺上對石城流水鍾阜諸峯問  
六朝陵闕何處是遺蹤後庭花更無留響渺春潮殘照  
笛聲中悲歡夢蕪城楊柳幾度春風

金陵雪後西望

水龍吟

不知玄武湖中一瓢春水何人借裁冰剪雨等閒占斷  
桃花春社古阜花城玉龍鹽虎夕陽圖畫是東風吹就  
明朝吹散又還是東風也回首當時光景渺秦淮綠  
波東下滔滔江水依依山色悠悠物化璧月瓊花世間  
消得幾多朝夜笑烏衣不管春寒只管說興亡話

烏衣園

南鄉子

醉罷黑瑤池渺渺春雲海嶠歸畫棟珠簾成昨夢誰知

百姓人家幾度非  
相對語斜暉腸斷江城柳絮飛再  
見玉郎應不認堪悲也被緇塵染素衣

舒州 清平樂

秋懷騷屑卧聽蕭蕭葉四壁寒蛩吟不歇舊恨新愁都  
說疎疎雨打栖鴉月痕猶在窻紗一夜西風能緊明  
朝瘦也黃花

惜別 浪淘沙

別易見時難萬水千山參商煙樹暮雲間料想鳳凰城

裏夢夜夜歸鞍 楊柳小樓間倚遍闌干東風剪剪雨  
珊珊落盡桃花無可落只管春寒

送別 浣溪沙

一曲離愁淺黛顰雲帆渺渺下煙津山長水遠客愁新  
柳絮低迷千里夢桃花蕩漾一江春小樓疎雨可憐  
人

閨怨 祝英臺近

綵雲空香雨霽一夢千年事碧幌如煙却扇試新睡恁

時楊柳開干芙蓉池館還只似如今天氣遠山翠空  
相思淡掃修眉盈盈照秋水落日西風借問雁來未只  
愁雁到來時又無消息只落得一番憔悴

寄與屯竹庵察副留金陵約遊揚州不果

水調歌頭

腰纏十萬貫騎鶴上揚州詩翁那得有此天地一扁舟  
二十四番風信二十四橋風景正好及春遊掛席欲東  
下烟雨暗層樓紫綺冠綠玉杖黑貂裘滄波萬里浩  
蕩踪跡寄浮鷗想殺南臺御史笑殺南州孺子何事此



淹留遠思渺無極日夜大江流

賦竹樽

滿江紅

千畝君封新移就美泉天祿形製古椰樽嫌窄瓠壺嫌  
俗愛酒步兵緣業重平生所願何時足再來生意隨此  
林中充其腹 秋入洞鑑金筑春出戶跳珠玉想宜城  
九醞葉光凝綠驢背夕陽同倒載醉鄉只在篋簞谷問  
東坡何獨飲松醪還思肉

乙未仲秋後二日同范見心李思宣飲百花洲上

待月魯公亭呼月  
碪禪師不應放棹東湖夜色  
皎然見心用龍州少年游韻賦詞因次韻

回棹百花洲迢迢碧玉流  
聽笛聲何處高樓如此江山  
無此客雖有酒奈何秋  
呼月出雲頭問渠能飲不笑  
人間元自無愁可惜月  
翁呼不出呼得出載同遊

送春

朝中措

游絲千萬暖風柔  
只繫得春愁恨殺啼鶯勾引孤他燕  
語攀留  
縱然留住香紅吹盡春也堪羞  
去去不堪回

首斜陽一點西樓

寓城思歸竹庵留行賦呈

眼兒媚

暖雲挾雨洗香埃。剗地峭寒催。燕兒知否，鶯兒知否，  
厮勾春回。小樓日日重簾捲，應是把人猜。杏花如許，  
桃花如許，不見歸來。

濡溪悼舊

訴衷情

曲屏深院赴幽期。心事夢雲知。佩環零亂，何處江上草  
離離。日平西。天似幕。月如眉。依稀還記兩岸楊花送。

上船時

落星寺

賀新郎

帆影斜陽裏與蘆花分風飛過落星遺此瓦老苔荒鐘  
鼓陋班荆殘碑無幾想此處閱人多矣天上白榆猶落  
去況人間一瞬浮花蕊問五老笑而已仙翁當日曾  
揮塵拍闌干浩歌音響振魚龍耳九十餘年無人問遺  
韻半江烟水慨宇宙風濤如許安得六丁移此石去橫  
身作箇中流砥長嘆罷冥鴻起

汎大江 青玉案

巨舟雙舫鳴鵝鸛千萬頃玻璃面宇宙浮萍堪永嘆黃  
唐開闢秦隋爭戰不把江山換 蘆花新雪秋撩亂何  
處漁舟起孤管一片古愁縈不斷平沙矮樹溪烟荒岸  
落日西風雁

題永平監前劉氏小樓 酹江月

遠山如簇對樓前濃抹淡粧新翠應是西湖湖上景移  
過江南千里舊日春光重歸楊柳冉冉黃金縷市聲分

付畫橋之外流水 最好疊觀泥金危城帶粉文筆雙  
峯倚煙寺晚鐘漁浦笛都入王維畫裏歌枕方床凭欄  
往古世界浮萍耳湖天風緊白鷗欲下還起

呈譚龍山 大江東

錦袍何處向舊江衰草寒蘆蕭瑟瀛館神仙揮玉塵喚  
醒詩酒魂魄走電飛虹驚濤觸石舉目乾坤窄油然歸  
去短篷多載風月 好在雨外雲根水邊石上鷗鷺盟  
重結見說西湖湖上路香沁梅梢新雪駕白麒麟鞭青

金瓶梅詞話卷三  
鷺鳳次第孤山客吾今西嘯寄詩先與逋仙說

菊酒 一剪梅

小小黃花爾許愁楚事悠悠晉事悠悠荒蕪三徑渺中  
洲開幾番秋落幾番秋不是孤芳萬古留餐亦堪羞  
采亦堪羞離騷賦罷酒新篘醒也風流醉也風流

九日登城 水龍吟

荒城落日西風滿街芳草無行路樓臺羽化螢飛故苑  
蛩吟踐礎不減承平半湖秋月隔溪煙樹慨江南風景

一朝如許教人恨王夷甫  
對酒強推愁去酒醒來愁  
還如故青萍三尺陰符一卷土  
花塵蠹試問黃花花知  
余否沉吟無語拍闌干空羨平沙落雁滄波歸鷺

雨中春懷呈準軒

清平樂

清明寒食過了空相憶  
千里音書無處覓  
渺渺亂蕪搖碧  
蒼天雨細風斜小樓燕子誰家  
只道春寒都盡一分猶在桐花

梅花十閼

秦樓月



雲根屋東風四壁花如玉花如玉水仙傷婉山礬傷俗  
高標懶趁時粧束一丘一壑便幽獨便幽獨商山四  
皓首陽孤竹

羅浮暮青松林下相逢處相逢處縞衣素袂沉吟無語  
行雲飛入瑤臺路夢回飄渺香風度香風度參橫月  
落幾聲翠羽

葉葉裏一枝冷浸銅瓶水銅瓶水飛英簇簇硯屏香几  
夜闌雪片敲牕紙半衾芳夢相料理相料理梨花漠

漠江南千里

春脉脉含章簷下粧宮額  
粧宮額也還點畫村烟茅結  
人間天上俱清絕風流太似東坡客  
東坡客玉堂如玉雪堂如雪

紅苞折巡簷一笑風情別  
風情別廣平空道心腸如鐵  
灞橋更有狂吟客短鞭破帽貂裘窄  
貂裘窄瘦驢卓耳一鞍風雪

春來了孤根矯樹花開早  
花開早水村山郭嫩紅青曉


隴頭何處鱗鴻杳一枝欲寄行人少行人少大江南  
岸北風低草

齊山頂掃開殘雪簪花飲簪花飲樽前人唱暗香疎影  
枝南枝北迢迢恨春風舊夢難重省難重省小窻斜  
月薄醒殘醒

花孤冷海棠聘與花應肯花應肯海棠只是無香堪恨  
香無却有仙風韻能爭幾日芳期近芳期近東風何  
事不留花等

醒人眼一枝玉雪疎籬晚疎籬晚精神曠逸風姿凝遠  
幽香零亂無人管依依春恨天涯滿天涯滿霜城戍  
角月樓羗管

幽香歇玉龍吹徹花如雪花如雪小橋流水不勝愁絕  
橫梢剪入生綃墨翠陰青子盈盈結盈盈結淡煙微  
雨江南三月



鄱陽五家集卷三

欽定四庫全書

集部

鄧陽五家集卷五

詳校官監察御史臣孫家賢

主事銜臣徐以坤覆勘

總校官知縣臣繆琪

校對官編修臣于鼎

謄錄監生臣羅應台

欽定四庫全書

鄱陽五家集卷四

鄱陽史簡編

元吳存樂庵遺稿一

先生生于宋寶祐五年丁巳二月諱存仲退其字也少力學絕去恣瀆以童子試有司英聲四馳鄉先生吳公中行李公謹思黎公廷瑞皆折節下交待以國士元初部使者姚公燉盧公摯奧屯公希

魯行郡至鄱陽皆勸以仕不答延祐元年乙卯設  
科取士邑大夫三造請試固辭已而縣牒上府無  
先生名太守史公烜怪之曰無吳先生名何耶使  
知事劉衍往見諭意強起得以尚書中選試禮部  
弗遇諸公貴人交章薦之先生以即日去國乃遇  
恩授饒州路學正任不及代歸更號月灣漁者思  
嘯歌溪上將老焉乙丑調寧國路儒學教授先生  
以老不欲往請者狎至乃往憲使李公元成公珪



一見喜得師尊禮極至未久引年去任去之明年  
授將仕佐郎饒州路鄱陽縣主簿致仕又七年江  
西行省鄉試聘為主文至元五年己卯九月終于  
家年八十有三先生蚤孤三弟四妹俱上鞠于祖  
母世更力役繁重下吏掊克家亦毀先生委曲經  
營授徒自給畢弟妹昏嫁不使一毫憂念及其祖  
母祖母戒勿飲酒遂終身不近杯勺蓋先生之學  
得之齊夢龍氏齊氏學于沈貴賓氏沈氏學于董

銖氏董氏實師朱文公嘗語門人劉耳曰誠而樂  
始足為學學非樂不足以為學樂在心心誠則樂  
妄則不樂一言一動不可不誠不誠不樂也所著  
有程朱易傳本義折衷鄱陽續志新志月灣詩藁  
巴歌襍詠孫用臧用晦並有文名

七言絕句

山茶四首

吾家屋後山茶樹樹始栽時我髻丫三十四年今過屋

春風兩鬢不教華

此樹先人手自栽當時數日待花開樹今如此人何處  
慙愧春風歲歲來

當年此種外家分歸載琅玕笑市人外氏凋零吾漸老  
寒泉千載哭青春

兵後荒殘賦役頻故家斤斧到荆榛年來桃李春風鬧  
誰識承平雨露身

過大野

梁山泊裏雨濛濛  
借得鷗沙過短篷  
三百里天香世界  
平生無此芰荷風

淮陰漂母墓

漂飯千金報尚輕  
更緣推食許平生  
區區報施何時了  
一飽男兒好自營

稻花圖

玉碎珠明麗野田  
不將頰紫競春妍  
一莖露綴秋風裏  
中有蒼姬八百年

雙雀圖

野田秋粟啄堪肥  
挾彈張羅總禍機  
叢竹蕭蕭風獵獵  
莫辭枝上凍相依

停針圖

停針元不為傷春  
巧奪天機亦損神  
長日支頤無一語  
應思身衣弋絳人

聽雨看雲二樓

淒涼東府對床吟  
蕭瑟巴山語夜深  
人聽自悲君自樂

古今同耳不同心

靜閱天機此倚闌  
崔嵬未了忽波瀾  
萬般起滅都看盡  
一碧澄然更好看

橫塘秋晚圖

折葦枯荷綠一窪  
游魚戲蟹小生涯  
水紅花外秋偏富  
付與鴛鴦占晚沙

范寬小景

蹇驢馱醉暮歸遲  
一犬迎門吠短籬  
此是詩人堪畫處

畫來又費幾人詩

荷葦白鷺

浦葦汀荷戰晚風  
三三五五雪衣公  
故應如此丰標好  
合著寬閒寂寞中

貴溪道中欲經湯原不果

三丫路口逢朝雨  
百丈山頭見午晴  
偕問湯原三十里  
僕夫揺首欲歸畊

客館思歸

陰陰野樹鳴啼鳩漠漠餘寒落棟花十載送春渾是客  
五更聽雨忽思家

絕句

蹇驢昨日雪濛濛破帽呼舟古渡風吟得詩成還不吐  
要留此景著胸中

東湖十詠

兩堤柳色

南北長堤彩蜨連垂楊夾道綠如煙春風賸長絲千尺



辦與遊人繫畫船

雙塔鈴音

文筆雙峯銳刺天  
風簷萬鐸語蒼煙  
沙門聽徹渠應解  
說到番君教戰年

孔廟松風

范公震澤跨龍來  
鎖向湖濱不放回  
翠鬣蒼髯時一奮  
孔堂白晝起雲雷

顏亭倚雨

萬斛明珠洗綠盤魯公亭上倚闌干誰知倒挽銀河下  
天為忠臣洗肺肝

湖中孤寺

佛屋巋然水四圍晴光波影漾禪扉老僧隱几青楓表  
笑看滄洲白鳥飛

洲上百花

湖光三面浸樓臺東面天橫錦繡堆辨取四時洲上醉  
不妨三日一花開

薦福茶煙

晴霏冉冉上松枝  
莫莫堂中茗事遲  
欲訪趙州消午困  
趁渠蟹眼未生時

新橋酒旆

橋邊窓戶小家樓  
新釣魚肥酒旋筍  
可是東風能喚客  
青帘舞過柳梢頭

江城暮角

城頭三弄夕煙橫  
城上戎衣寢不驚  
四十年來無戰鬪

梅花吹入太平聲

芝嶠晴雲

千仞屏愚杳靄中晴霏朝暮乍青紅遙知郁郁紛紛處  
下有先秦白髮翁

五言近體

遣興

已拙治生理兼無用世才年年中酒過日日典衣回寒  
食梨花落江南燕子來山深舊知少懷抱向誰開

與徐山玉

愛子眉垂白於余眼倍青眠雲豫章榻呼月鵲湖亭世  
慮吾忘我天機影答形木蘭枝上露香入太玄經

秋日有感

半生真逆旅萬事等虛舟未老先成懶雖貧不解愁西  
風三日雨南楚十分秋閨婦為寒計篝燈葺弊裘

壯懷

登覽心猶壯栖遲髮易凋江山如有待歲月不相饒匹

馬觀嵩嶽扁舟聽海潮茲遊終有遂辦取一裘貂

風雨

風雨春強半鶯花日許長詩添子美瘦酒減次公狂客  
欲巾車去余方蠟屐忙相看一笑別江上又斜陽

宿慈雲庵懷梅山

慈雲樽酒地回首輟鄰春水壞車行道雲迷手植松百  
年嗟我後四海念誰從風雨春歸夜還聞景德鐘

贈鄭尉畊巖

巖栖今鄭老市隱舊梅仙世隔青衫夢詩凋白髮年故  
山三逕草樂土一哀煙應笑清灣叟當時問北船

悼所乘紫騮

共詫追風健何虞歷塊傷世非無駿逸我獨念馴良短  
策城邊月枯萁埜樞霜舊遊堪一嘅心媿敝帷藏

操氏晚隱

能隱寧論晚誰知晚更宜漁竿諳渭石象奕老商芝骨  
健風霜耐心閒日月遲但煩多釀秫醉傲太平時

挽黃易安

芝麓開仙跡丹霞傍洞天竟隨雙劍化尚想一壺懸月  
浸鳴弦室雲生種秫田泠泠華表語更俟後千年

冬日郊行

萬竅聲鳴鏑雲連色死灰羣鴉刺天去孤隼遇風回木  
葉無可落梅花不肯開歸來聊抱膝吾子固堪煨

宿王存善江樓

晚出番君國夕眠王粲樓疎砧深巷雨殘角古城秋避



近成幽趣登臨憶舊遊好將塵世眼長此對螺舟

七言近體

徐松巢挽詞

昌水番江虎座尊歸來丹鼎煮雲根莫嗟風落松無子  
自喜朝陽桐有孫易傳一編了今古詩名千載重乾坤  
好將庭下黃花露招取南州高士魂

清明遊徐公墓下

格磔山禽破曉雲青鞋裹濕上嶙峋清明寒食疎疎雨

柳絮梨花淡淡春，  
麗老山中逢上塚。  
周家栢下見遊人，  
三生曾掛延陵劍。  
回首人間隔幾塵。

雜興四首寄芳洲

置酒荒臺日未晡，  
酒酣擊缶自歌呼。  
春從杜宇聲中去，  
寒到桐花開後無。  
萬里江山增感慨，  
一年風雨減歡娛。  
歸來掩却柴門卧，  
一逕殘紅護翠蕪。

世故年來閱已深，  
萬方覆却不驚心。  
莫嫌叔夜未忘鍛，  
自是淵明偶有琴。  
衣食未妨依馬磨，  
文章何必銜雞林。

人生留得青青髻莫遣吳霜取次侵

倦坐聊分鄭老種忘言自守子雲玄繞枝三匝違初志  
上樹千回憶少年早不自知窮有鬼吾今直以飲為仙  
故人識我機心淡遠寄黃庭內景篇

塵網栖栖三十秋青春背我已堪羞書留後世揚雄賞  
詩帶前生杜甫愁隱去只須名謾記病來方始悟浮休  
明年定買舟如葉小住東風杜若洲

胡仁傑索舊作次韻

一囊自記平生夢  
反復看來笑復嘖  
老矣廉頗空善飯  
少之燭武不如人  
筆枯風雨千言疾  
眼眩煙雲萬態新  
我誤已深君勿誤  
古來技富得家貧

凝夜行大野湖中

湖海三生一念差  
扁舟夜夜艤蘆花  
身經雁帛飛來地  
夢繞龍梭化處家  
溪語船頭風力順  
露明蓬隙月痕斜  
若無織女支機石  
誰信河源八月槎

自燕南還金陵采石丁家洲次韻

六朝夢事閱千基底用吳腸作楚悲天地自應存子奪  
江山元不預興衰曲憐商女新聲唱文愧山靈舊日移  
第一層樓猶有酒不妨重和謫仙詩

布帆又過望夫峯今度南歸喜得風犀炬已消餘夕燐  
錦袍不朽照晴虹物繁稍見豐年象戍盡方知治世功  
五十年前翁記否只應江浪至今同

疏鑿當年費五丁洲名猶足記江程夢松覺後海潮落  
化鶴歸來沙月明萬古文章無泯滅百年陵谷有遷更

誰知鷗沒鷗浮處聽得朝陽老鳳鳴

過廬山下

白鳥雙飛入鏡奩千帆徑度午風恬大姑波濯生塵襪  
五老雲開捲雨簾梵唄仙音專地勝林霏野色挾秋嚴  
八年不見宮亭水小注清泠入硯蟾

挽黎芳洲

當年赤手奪青衫風引蓬萊碧海帆師道晚行文學事  
澤民空署法曹銜苔迷車馬平生跡塵鎖詩筒舊日函

莫恨芳洲秋色晚  
瓏璵玉樹總非凡

程昭伯示宗人宗野甲寅送別詩次韻

北去南來日月茫  
髮毛雪白視荒荒  
不辭萬里歸舟晚  
坐愧諸公贈墨香  
老我無書上光範  
何人有酒博西涼  
無端昨夜松間夢  
猶逐飛雲到帝鄉

長江萬里圖

管城縮地亦仙才  
萬里江天咫尺開  
遠樹平蕪連莽蕩  
斷橋危室枕崔嵬  
濤翻太古西山雪  
石蓄晴天灩澦雷

忽見扁舟鷗鳥外年時征夢上心來

丙辰中秋晴景憶舊遊

憶從秋雁出天都颯颯西風兩岸蘆堂邑片帆潮外落  
博平斗酒水中沽當時萬里勞歸夢此夕空山笑故吾  
莫惜高歌酌節序桂香月色去年無

過梅山周公墓下

不到鵝塘又五年蒼然宰相閱荒煙重哦天上招魂些  
三叫雲間蛻骨仙步繞空山尋落葉恨無秋菊薦寒泉



茫茫四海豪華盡回首平生一慨然

彭氏母百歲二子八袞

彭鏗之後仍多壽華萼相輝兩弟兄  
白髮百齡堂上母綵衣五世眼中孫  
熙朝優老曾分帛憲使觀風合表門  
惆悵平生懷菊意春暉無地報深恩

送齊莊叔入為儀曹掾并東張夢臣國博馬伯庸  
御史

儒衣持橐佐春官萬里雲霄入羽翰  
似子青衫鞭好著

看予白首缺猶彈臯比日照先生座象角風生御史冠  
欲折梅花憑寄遠江南雪後北枝寒

次韻方山馮公見寄

方山年七十九  
矣居百丈山下

晚學無成媿寡聞著書千載羨公勤天高誰識潛心苦  
地遠何由會面頻雨入東湖青迤邐雲開百丈碧嶙峋  
夜涼露坐哦佳句南極時時見老人

新堂甫完季弟仲文自別墅回喜賦

兄弟離居十二霜天教歲晚得同堂荊花再茂春逾好

棣萼相輝日正長  
七世衣冠廳事在一門  
弓冶墨池香  
句吳友讓傳家久  
共戒兒孫慎勿忘

登望湖山分韻香字

雨滯芳遊病更妨  
登危筋力喜猶強  
山光遠映鬚眉潤  
春氣濃熏杖屨香  
古廟靈衣新黼黻  
長松天籟舊宮商  
畫樓畫鎖黃冠出  
却笑閒人有底忙

伯溫如杭寄仇山村

周郎明日杭州去  
問訊山村安穩無  
我恨不乘溪上舸

君當一訪市邊壺夢殘東滙漁樵社思入西山煙雨圖  
老去釣竿無著處他年還欲拂珊瑚

寄楊師文教授

想見東湖秋水碧蘋花兩岸白漚風舟橫島寺煙霏外  
人在宮牆樹影中忽憶連床前日樂相携載酒幾回同  
祇今百里無消息湖海他年况轉蓬

九日赴徐蘭玉郭峯別墅之集追懷庚寅舊遊

蘭玉

號雲壑松  
巢從弟也

烏龍潭上一壺天回首前遊五九年雲壑新來成小隱  
松巢久已化飛仙屋頭泉入燒茶鼎谷口雲生種糯田  
借得客床圓舊夢夜闌虎嘯不成眠

和徐君玉韻

高士鋤雲卜洛邱重陽宴集意綢繆鑿開郭璞山前路  
占斷番君國裏秋携客登高兄弟倡題品紀勝姓名留  
退翁一笑煙霞表不負平生是此遊

上巳日徐蘭玉訪予溪上賦贈

近來久已却肥甘  
蔬筍蕭然對客談  
風雨空過一百六

鶯花又負幾重三  
麥黃滿地家家飯  
桑綠如雲處處蠶

何幸時平田里樂  
與君畊鑿老江南

以上三首原集未載今得之鵲湖徐

氏譜中特附入按月灣與松巢前後唱酬極多如和梅十絕又見之松巢漫稿內其他遺漏可知也至題魏石山有句云山作怒猊常吐霧石如渴驥欲吞江予猶見鄉先達陳春臺先生修邑志載入以為真得其狀今皆畧而不傳殊可惜也

哭秋湖徐天麟

不見海棠巢上仙  
風蟬蛻骨已三年  
當時好客頻投轄

此日懷人欲絕絃春燕自歸王謝宅夜虹誰覓米家船  
重來詩景元無恙島雨湖煙共慨然

郭錄判來板橋訪余不值及余至則已行矣乃賦  
詩追送

我來君去如相避但恠落花流水香白日正堪文字飲  
青山似笑簡書忙鳴騶道路春光晚啼鴂園林雨意長  
自是神交形迹外剡溪不見又何妨

登悠然閣懷南翁上官伯圭見和再次韻

悠然老子瀛洲客騎鶴一去三千秋斯人可與酩酊醉  
當時惜不逍遙遊霓裳一曲廣寒夢弱水萬里蓬萊舟  
公來何莫吾已老西風落日登茲樓

次楊妃菊韻

委地花鈿散不收開元帝業渭東流三生雲霧深宮曉  
一滴風霜老圃秋淡似倦粧濃似醉向疑凝笑背疑羞  
人間富貴空餘臭籬落吹香正未休

次韻周鼎仲拙齋



茫茫宇宙一廬蝸人事無涯生有涯冷看世情窮百巧  
孰知天意故多乖騎牛春谷雲生袂抱甕晨畦月滿懷  
屋角鳴鳩宮徵足素琴何用八音諧

朱氏春暉堂

阿母童顏雪滿簪綵衣拜舞北堂深直期千歲蟠桃實  
長抱三春寸草心山暖蟬鳴煙淡淡日長禽語樹陰陰  
好將東野詩中意寫入花前綠綺琴

彭忠烈錦袍鍔扇落他姓孫公尹購得有詩次韻

原二首今  
錄其一

東歸幾日竟南遷  
苔沒渝城萬仞鐫  
社稷已墟遺古廟  
英雄不死作飛仙  
空聞扇鐵遮西日  
忍見袍花麗晚天  
猶有故家喬木在  
年年春綠照番川

題曹公元母苦節志

大家班妹賢無敵  
尚想初歸世叔時  
風雨兩髦泉下土  
乾坤一髮袴中兒  
九熊日俟門閭大  
懷橘天留歲月遲  
近代巴清猶立傳  
可無人采栢舟詩

次苑知事秋日懷故園韻

紅葉侵堦草映扉先生危坐了朝暉  
官清頗訝休文瘦義勝方知子夏肥  
且可一樽持郭索何須萬里嘆伊威  
芝山爽氣年年好未覺微之拄笏非

館閣英才一網收泛紅何事此來遊  
卧聽疎雨鳴蟬晚愁對空江落木秋  
一片孤忠心北拱五更歸夢水東流  
煩君小作三年住莫遣吾邦顏范羞

次楊仲弘東湖四景韻

灩灩湖光照市閨太平延祐十分春秋千影漾紅粧靚  
鑿落芳傳綠酒新夢到看花曲江上人疑脩禊洛川濱  
祇今能話歌遊樂猶有姜堤白髮民

城中地隘暑偏多競泛鷗沙百頃波蕭寺晚涼風戛竹  
顏亭書靜雨鳴荷參差楚產供槃飮幼妙吳音雜棹歌  
拚取千金湖上醉人間富貴易消磨

久無人沉錦袍舟誰共湖天一片秋潮落石橫迷古埭  
霜飛木落露浮洲雁聲叫月來無盡菰米沉雲散不收

漁唱一聲何處起有人懷古涕先流

訪梅欲覓老逋家小國清寒力漸加雪意動時雲罩樹  
日痕薄處凍生花沙邊鶻落飛戍騎箔下魚跳平聲集釣  
槎聊補番君風土記未須持向北人誇

彭濟川挾醫游昇

白袍烏帽小綸巾君是彭鏗第幾身肘後有方能却老  
眼前無藥可醫貧好將玉札丹砂手去看長干白下春  
若見故人詢退叟為言心鐵髮如銀

鄱陽五家集卷四

欽定四庫全書

鄱陽五家集卷五

鄱陽史簡編

元吳存樂庵遺稿二

五言古風

擬古

青青園中葵托根信云美  
夙承春風恩華葉光嶷嶷  
願得羞王公顏色照筐篚  
道路阻且長終然不我以  
悠悠

歲年晚零落自此始獨有太陽心不為霜雪死

楚國有佳人雙蛾秀娟娟自倚容色好不復施朱鉛舉  
世非所偶窈窕誰為妍獨抱松栢心坐閱桃李年盈盈  
東家妹綺羅照珠鈿賦命固有定脉脉良自憐

二月望日

忽忽春已半我酒不得持今晨始無事出門草離離喧  
禽樂新霽羣動各以時居人亦有營驅牛向東菑我學  
嘆遲暮今茲復來茲同舍笑謂我用此鉛槧為當年不



見察萬世以俟誰明朝是社日且啜山中醪

次韻寄月礪

平湖湛初晴碧色照蓮宇湖中舡子僧湖上蔬籃女遙  
知一堤柳風絮正飛舞安得携同袍清嘯倚晴樹關關  
幽鳥啼渺渺芳草暮唯應溪上人垂釣有深趣

晦日風雨

緼袍暢商音帶素靡憂色大鈞無私貧是事可容力唐  
風陋以卑結柳事祛辟退之謂知道亦復費行墨當年

著原鬼晚受五窮責一時縱寓言千載殆茲惑因思窮  
達際今古鮮卓識閉關風雪中一笑墮吾情

寒驢

一驢寒復寒負我自有餘我行東西郊不亟亦不徐日  
出尋我友日入息我廬看山或躑躅步月仍躊躇爾寒  
吾不厭慎勿欺我癯權門汝弗售高駟非我須材力各  
有稱分齊戒所踰引首忽長鳴似與我意俱呼童置綠  
陰報以一束芻

蕪菁花

桃李春未動蕪菁已煌煌我家溪上田百畝春風香春  
風日初晴蜂蝶紛如狂霏霏適此時翕翕理亦常一氣  
暢旁礴萬彙生輝光盛麗自有屬鎖碎豈足當偶出紅  
紫先遂擅一日塲兒童眩目前不復知衆芳桃李終不  
言含情待熙陽南山有老栢終歲常蒼蒼

答婦

我行桃未開我歸筍成竹久客欲何成蒼苔繞吾屋書

燈仍舊青客髮非故綠婦亦笑我癡胡不捨句讀老生  
方隱几起坐一捧腹方今聖明代四民各有屬上者萬  
鍾榮下者一屨足簪組吾弗任畊稼非所服手鋤誠迺  
勞庶以功易粟卿言亦大好吾計固已熟百年須幾何  
勿使兩眉蹙婦笑更謂余新醅似堪漉

余穆如子自彊來訪

脩篁蔭晴疏涼思生午簟剝啄驚問誰玉雪明几硯故  
人有此子別久欣乍見吾髮能不凋昔少今已弁而翁

二十年交誼深繾綣居然乘風歸每念臉欲泣舊游均  
夢境浮世一乘傳傳家見弓冶何用悲露電詞章亦細  
事正用飽書傳聖賢亦由人男子當虎變

題老圃生意卷

霜餘日初晴臘後春欲動曳蹤行我畦陳根撥殘凍鱗  
鱗萬甲綠已覆前日種孰知大鈞仁塊北無盡用一種  
守酸寒菜把煩日送茲晨旅顏破意到冰百甕區區田  
野心片美亦思貢未敢語朝簪方酣萬羊夢

霜鐘琴

昔余北征年歲晏霜滿野江城起疎鐘殘月隨瘦馬此  
時詩有思徬徨不得寫孰云春容音殷殷君指下千年  
嶧陽桐勁氣種拱把斲之腹空洞宇宙寄瀟灑中郎久  
不作妙質誰識者君從何處得此物今代寡吾聞豐山  
鳴寒玉粲萬瓦安得絃清商為我洗炎夏

許叔仁池上觀萍寄徐山玉

款款池上雨離離雨中萍方聚若浮雲忽散如流星永

懷平生友雨翳山冥冥今我雙履迹何由至其庭舊夢  
四十年松間兩囊螢相從豈無時念此秋髮零向來蒼  
松色鬢毛與之青我髮已如茲松下應有苓歲晚携長  
鏡一嗽三千齡迂言以自慰勿遣傍人聽

與許季蕃過梅花岩用松巢韻呈登庸

平生物外趣頗恨物累纏窮幽躡躡嶢嶢自笑老更儂蒼  
崖腹空洞中疑蟄飛仙昔聞丹邱人曾賦小有天遺音  
在品谷殷殷聞風前是日霜氣肅晴暉發春妍冥行石

閣底忽射天光圓少林面壁相膝有蘆芽穿浴丹某氏  
井種玉何人田初平去不歸誰叱羣羊跼欲携小龍團  
來試玉竇泉安得呼詩翁操觚與周旋但恐石髓乾欲  
食不下咽神清若有得筆弱何由宣崑東有臯比講舌  
天河懸玉樹更可人冰雪不待湔豈無山中招紀此石  
上緣重來定何時一拂蒼苔鐫

周別駕載酒共賞張園芍藥五言紀事

山深鵲初鳴春去芍藥在二難此清遊羣彦復來會華



顛一枝節徐步蹠飛蓋孰知豪俠場而有清淨退行厨  
既先馳清醕亦兼載枯篁戛宮徵聲若九霄珮此花鬪  
栗時正坐風雨晦相逢一何暮可喜亦可嘅主人未厭  
客更許他日再且盡樽中歡紅芳不君待

次徐可玉天池韻

吾聞青羊砦上有蛟龍窠幽探已前期坐閱日月多筋  
力賴未衰自許善飯頗擬携鈍毛錐徃就石上磨尚恐  
人跡稀傳聞或多譌此山東南來奔湧如怒鼉未應千

但頂潞此一勺波竭來讀君詩句法追涪皤謂此鍾地  
靈信哉蓄天和想見煙霞表平眎星宿羅拂拭一枝藤  
遠興生嵯峨白雲儻來迎清風為前訶更約巢中仙復  
輿重來過一漱天池泉三咏天池歌月明吹玉笙鶴舞  
應婆娑兒童顧我笑翁語多談河欲對麋鹿眠芳草尋  
陽坡百年更餘幾此事堪蹉跎方今文運熙羣賢起巖  
阿吾徒此遊息不樂當如何

敬亭山懷謝

輕陰閣朝雨暖吹收春靈行行出西郊山氣日已佳飛  
仙有靈跡凌雲敞高齋不辭躡丹梯寧論濕青鞋幽花  
旣窈窕新笑何嗒嗒尚恐林谷深下有虎與豺風騷千  
載人生晚不及偕悠悠寄孤吟日暮增深懷

贈寫真朱梅癯

梅花蛻塵埃一癯傲冰雪孰能寫其真山中有孤月今  
朝寫老月梅花似多情月本無實相相逐梅花生梅香  
遠更清月色寒亦好共結無情交萬古長不老

陳氏雨窓

窓前綠陰橫窓下薜紋綠此時窓中人日永春睡足急  
雨從何來浩蕩鳴我屋浪浪如建瓴袞袞似懸瀑餘吟  
晚未斷匏磬雜琴筑推窓看前峯雲氣正氛郁還坐更  
支頤妙趣那可獨戶外有履聲爐中茗初熟

淵明歸去來圖

五斗輕敝屣吾腰重千金搖搖一葉舟載此無絃琴是  
非有萬古不在昨與今易寫彭澤興難寫東籬心

題松溪卷

卷中如貢仲章仇山村皆余知  
已陳華仲宛陵士也因書係感

仇池仙之癯吳語特高古  
貢公冠峩峩江左丈中虎  
三年不通問俱作泉下土  
忽開松溪卷如對二君語  
廉藺千載人凜凜鸞鵠舉  
塵網朱絲絃欲拂為誰鼓  
陳三固無恙千里隔桐浦  
掩卷歸松君梅花暮江雨

許氏竹外

翠屯一川雲碧立萬竿玉  
使身處其間咫尺不見竹  
何如居其外對此心肅肅  
如交衆君子不諂亦不瀆  
直以

正吾邪清以醫我俗久而與之化不待三熏沐吾聞衛  
武公盛德配猗綠千載猶可師為君賦淇澳

葉氏攀桂樓

天人何所居清虛廣寒府桂樹生其間根蟠萬萬古青  
冥不可梯芬菲君為取美人貽謀遠危構天尺五斫之  
應不難姮娥已心許金婆夜夜明金粟年年吐珍重法  
喜孫更礪西河斧

七言古風

秋社

江南太平重秋報村東村西田鼓鬧歲無旱溢國無兵  
露積千倉煙萬竈予時童叟未憂翁豈憂無酒可治顰  
那知回首二十載半間社屋蒼苔封低頭自讀元祐史  
麟趾深仁泱肌髓一匙社飯千古悲後園秋雨號狐狸  
新安王仲儀訪余不值又來浮梁得會縱游數日  
而別

淞江秋濤薊門雪南北與君同一轍歸來相望兩青燈

壑甕嚼酸冰作屑我泛雙溪訪舊遊  
菡萏香銷雨聲絕此時君從芝山來  
兩袂冷風洗煩熱一朝邂逅論三載  
如寐得醒飢得啜浮梁近郭多佛屋  
處處煮茶憩清樾寶積山前漱玉亭  
尚想金山廣長舌金鰲穩處瑤珠樓  
飛簷倒影蛟龍穴恨不清秋此倚闌  
下看玻瓈浴明月此邦文物承平舊  
竹立衣冠鏘珮玦春風沂上更超然  
乾端坤倪見軒豁人生會難散苦易  
我意欲留君欲別釣天可聞不可譜  
天馬難羈意飄忽雪泥聊復記飛鴻



萬疊青山照華髮

次高彥文韻送王仲儀

剡溪文如下水舡天然之質無鏡鑄君如駿馬不受鞭  
目光夾鏡駿連錢信知文章有源委荷根為藕花為蓮  
宜同俗學枯且澀刮毛龜背難成羶宣城古號山水國  
敬亭雲氣雙溪煙玄暉太白舊吟處泠泠遺響留風泉  
扶輿清淑閱已久明時之瑞宜多賢君才槃槃無不適  
不居玉堂當木天譬如良醫蓄善藥痿者可起痼可痊

誰令臯比坐講易清晨滴露朱自研筆端武庫人詫杜  
腹中經笥誰嘲邊古今文治春塊北雨露未必榮枯偏  
豹文暫爾玄霧澤鷺翮一舉青雲連人言靈運易成佛  
自笑長房難得仙平生儲書一千卷清灣之上屋數椽  
牛鐸自諧欲誰賞石槃不透徒鑽堅竭來昌江與君遇  
適有詞客來星川偶然再鼓余已竭奇絕七札君猶穿  
文章于道亦何有如君豈但工槧鉛酒中真趣諒有得  
不妨更為醒者傳

百馬圖

史稱陸牧二百蹄此圖所有今倍之人生得此不啻足  
安用千戶封君為水暖沙明芳草軟渴飲飢飡飽仍驪  
驕飛相逐怒相踉獨樹磨殘午陰轉想見開元汧渭閒  
未刻未烙天真完奚官三年一度貢龍髻鳳臆歸帝閑  
吾聞一鷄空百鷲百馬羣中豈無驥憑誰喚起九方歎  
驪黃之外觀其神

周別駕清明出遊阻雨分韻牧字

書生不帶看花福憂樂陰晴手翻覆清明有約出郊遊  
旅枕夢回雨鳴屋貳車憐客開新宴佳釀濃傾不論斛  
縱令野逕踏殘紅得似虛亭賞新綠布韋接膝忘軒冕  
談笑生風勝絲竹金鞍紅粉杜陵詩歡意雖同終近俗  
百歲清明各餘幾青春好醉流光速不看坐上病相如  
元是三生狂杜牧

贈畫士

良工畫骨不畫肉俗士信耳不信目莫言畫者世罕逢

識者寥寥千載獨葉公去後少真龍與可以來多膺竹  
珠入緯蕭翻得煨宋人藏石夸為玉我年七十閱人多  
舐筆和鉛徒碌碌孰知吾邦有妙手墨光夜夜虹穿屋  
夙昔廬山有舊遊煩君寫入鵝溪幅雙劍峯前漱玉亭  
著我枯筇對晴瀑

毛鼎仲九日登榴峯望祀衢祖舉先典也次韻

楚聲多哀不忍和寒花滿地西風作去家昔聞丁令威  
述祖今同謝康樂松楸目短煙重重豺獺心長天漠漠

何年麥飯酒清明却話榴峯酒杯落

明皇倚楊妃菊為嚴氏賦

三郎玉雪真天人玉環酒面酣青春一聲鼙鼓香夢破  
玉樓去作蓬萊身當年報國心自矢在地為枝願連理  
返魂今見東籬花兩兩天然見秋藥根同榦同色不同  
東枝粹白西枝紅尚想霓旌下南苑袞翟同輦飄香風  
三生飽受繁華福甘與客星伴幽獨憑誰為繫護花鈴  
莫遣嚼花怨麋鹿

陪芳洲遊百花洲

昨日今日風日妍  
東舍西舍桃李連  
有衣且典洲上醉  
無錢莫喚湖中船  
羣兒竹馬走爭道  
誰家紙鳶飛上天  
豈無長袖公莫舞  
共對青春非盛年

朱氏四虎圖

兩虎驕獐戲相搏  
嚙膝攀膺氣交作  
一虎危坐首獨回  
一虎騰趨勢如躍  
勿矜肉飽身自閒  
會當驅汝守九關  
一聲怒嘯崖谷裂  
北風獵獵枯梢寒

詩餘

江潮貢院

水調歌頭

尺一九霄下華髮起江湖西風吹我衣袂八月過三吳  
十五西湖月色十八海門潮勢此景世間無收入硯蜃  
滴供我筆頭枯七十幅五千字日方晡貝宮天網下  
罩何患有遺珠用我玉堂金馬不用清泉白石真宰自  
乘除長嘯吳山頂天濶鴈行疎

謝番丞薦舉

滿江紅



詞賦凌雲醫不得家徒四壁俄又報槐花風急一天秋色老去以忘炊黍夢興來偶作乘槎客問當時鶚表屬何人松廳墨人縱有垂天翼誰不待培風力但吹噓到處扶搖咫尺倚我一枝壺叟杖為公三弄桓伊笛約相逢解佩換蒲萄長安陌

北上道別周明翁遇雪

水調歌頭

昨夢騎白鳳身到玉皇家晴開閭闔蕩蕩白晝舞天葩堂上圭陳壁委堂下鷺班鵠侍整整復斜斜一笑未曾

有兩眼眩光華 朝來見庭中樹玉槎牙馬頭憐我飛  
絮行色渺天涯想見燕山高處此際飄花如席萬帳擁  
瓊車誰信百花上江左有梅花

峨眉亭次韻

霜天曉角

龍梭四壁風浪生尋尺却上危亭孤嘯天無際水無極  
百年緣底急晚風牛背笛回首故鄉千里山一髮暮  
江碧

高郵舟中

江城子

酒爐餅舍帶長溝過揚州又高郵逆浪流漸寸寸溢行  
舟北望神京天共遠何處是五雲樓昔年此地足戈  
矛轉城陬屢回頭甍社湖中明月竟誰收欲問少年淮  
海士疎葦外起沙鷗

儀真次韻

滿江紅

興廢榮枯終不改江山千古笑當日龍爭虎戰一丸淮  
土世亂分屯維重鎮國亡守死無降旅到如今貢賦甲  
東南輸天府鴻與燕千帆度蠅與蚋千家聚有豪雄

杜保風流張緒白髮寧忘揮塵興青樓不是留琴處待  
明朝來問孝廉船乘風去

揚州摸魚兒

笑風流少年杜牧如今雙鬢成雪來尋葦菰梢頭夢二  
十四橋明月人事別把故國興亡欲問無人說淮雲萬  
疊但雨外疎鐘煙中斷角到曉共嗚咽 蕪城外幾樹  
西風落葉消磨多少豪傑平山堂上朝中措千載妙音  
幾絕歌一闋怪水部梅花怪我心如鍊才情未竭待跨

鶴重來纏腰半解一奏玉笙徹

舟中九日次韻

沁園春

萬里南還臨江一笑吾道滄洲算生來骨相不堪蟬冕  
帶來分定只合羊裘薄酒勝茶晚餐當肉六印何如二  
頃謀人間事看蜃樓城郭蟻穴公侯 舟中此日風流  
拚一酌黃花散百憂甚東籬縣令歸田自得西江工部  
戀闕多愁出處雖殊襟懷畧似光焰文章萬古留聊記  
取待他時話舊八極神游

春興 木蘭花慢

問東君識我應怪我髮將華甚破帽蹇驢清明無酒寒  
食無家東風綠蕪千里怕登樓歸思渺天涯煙外一雙  
燕子雨中半樹梨花 日長孤館小窓紗新火試團茶  
想明月灣頭家家筍蕨井井桑麻年華不饒倦客早青  
梅如豆柳藏鴉欲逐夢魂歸去客窓一夜鳴蛙

春夢

點絳脣

多事春風年年綠遍江南草羅裙色好莫把相如惱

夢入瑤臺搔背麻姑爪還驚覺杜鵑啼早一夜相思老

春歸

朝中措

蜂脾蜜滿燕成窠春事已無多風景付渠啼鴂客情還  
我煙莎春來風雨春歸風雨春竟如何輸與前溪醉  
叟紅雲波上漁歌

春閨送別

浣溪沙

花滿離筵酒滿瓶摘花未語淚先零杯行教醉莫教醒  
今夜酴醾連理枕明朝柳絮絮短長亭一般杜宇兩般

聽

清明夜與芳洲話舊

木蘭花慢

又清明寒食淡孤館鬱無憀正杜宇催春桐花送冷門  
巷蕭條芳洲老仙來下粲黃冠翠氅珮瓊瑤兩客清談  
未了三更風雨瀟瀟青雲妙士早相招同泛淞江潮  
看眼閱青徐氣橫燕趙天路逍遙明年此時何處定軟  
紅道上玉驄驕萬里江南歸夢青燈還憶今宵

禊日禁酤

八聲甘州



甚無情一信棟花風捲盡市簾青對樓臺寂寂管絃悄  
悄煙雨冥冥屋角提壺笑我不上五峯亭此日流觴節  
宜醉宜醒說與渠僕知否正門譏太白巷詬劉伶網  
絲沉玉聲辭暈入銀瓶右將軍蘭亭詩序儘風流千載  
事須停西窓下焚香晝永一卷茶經

秋水泛舟

水龍吟

陶公三尺漁梭十年來蘚枯塵壁無端夜半風雷入夢  
曉痕猶濕起喚蘭橈荻花蕩漾粘天晴碧望芝雲一點

爛銀盆裏青螺眼中堪識  
獨倚枕床清嘯看千帆霎  
時風力孤篷穩繫釣車慢卷綠楊汀側遠樹如煙飛鷗  
如雪暮愁如織倩何人小拂朱絃寫入一江秋色

督軍湖觀競渡水龍吟

平湖暮色冥濛雷風喚起雙龍舞吸乾彭蠡須臾喚作  
一川煙雨漢女霓旌湘妃翠蓋馮夷鼉鼓想祝融指揮  
濤奔浪捲來赴世間端午  
此地番君舊境問當年軍  
容何許垂楊斷岸幾回想像水犀潮怒風景依然英雄

遠矣悠悠漢楚笑邦人只記飯筒纏綵汨羅懷古

春雨連日

踏莎行

夜溜瓶懸朝陰墨鎖一年桃李糊塗過欲留晴賞待清  
明晴時只恐清明蹉倚杖孤吟焚香默坐春衫莫把  
春泥污憑誰有爪似麻姑明朝為擘浮雲破

九日會周南翁于溪上

摸魚兒

問籬邊黃花開否甕頭新酒芻未故人有約酬佳節一  
幅錦雲先墜凝莫睇正溪上西風颯颯吹涼袂行人笑

指大似淵明吟詩吻燥忍待白衣至 曾報與松下巢  
居居士應來別墅同醉三人對月歌還舞千載重陽奇  
事何況是青雲士京華冉冉催征騎吾儕耄矣願強健  
年年茱萸在手分寄五千里

閱周南翁所藏書畫惜其迂懷雅好因泣下不自

禁漫賦蝶戀花

傀儡場中青紫椽縱有神丹俗骨無由換可惜米顛蘇  
內翰風標何遠年何短 此日閒窓開寶玩想見江船

當日晴虹貫鍊石吳腸還易斷風吹老泪春衫滿

落梅水龍吟

無端夢醉西湖楊花撲帳春雲熱朝來問訊牆陰玉樹  
霏霏香屑粘竹如斑點衣如唾穿簾如蝶甚兒童驚怪  
東風幾日消不盡蒼苔雪莫恨玉妃渾老半面粧風  
流仍絕多情應有洛濱解珮江中捐玦消得幾番荒煙  
疎雨冷雲殘月倩何人報與廣平渠不解心如鐵

賦潮摸魚兒

定何人鞭蛟咎蜃盡驅山石填海海波全涌三千丈蓬  
嶠落翻鰲背天晝晦似睢水揚沙漠楚三軍潰東皇翠  
蓋遣海若搖旌馮夷擊鼓彷彿一時會 初發處練白  
海門如帶須臾雪嶺天界朝生暮落何時了幾度越成  
吳壞君莫怪這莫有至人呼吸乾坤外白鷗自在待日  
落潮平遊人歸盡飛過富陽瀨

雪次韻

水龍吟

一天雲似穹廬山川慘淡還非舊興來欲喚羸童瘦馬

尋梅隴首有客遮留左援蘇二右招歐九問聚星堂上  
當年白戰還更許追蹤否 却擁重裘深坐看飛花乍  
無還有老來拈筆不禁清凍頻呵龜手想見南山少年  
射虎臂鷹牽狗暮歸來脫帽銷金帳裏飲羊羔酒

壽族父瑞堂

水龍吟  
其日驚蟄

今朝蟄戶初開一聲雷喚蒼龍起吾宗仙猛當年乘此  
遨遊人世玉頰銀鬚胡麻飯飽九霞觴醉愛青青門外  
萬絲楊柳都撚作長生縷 七十二年閒眼閱人間幾

多興哀酸醎嚼破如今翻覺淡中有味總把餘年栽松  
長竹種蘭培桂待與翁同看上元甲子太平春霽

壽松巢次韻

最高樓

南州士人品角番川春動九霞筵臯比早志青雲上角  
巾晚傲白雲邊喜諸孫蘭洒洒玉娟娟笑七十曲江  
歡未足笑七十金城閒未得吾一壑可忘年金丹九轉  
來雲鶴玉琴三疊和風蟬報君知巢上老海棠仙

迎周明翁治中

錦堂春



萬里槎浮碧漢十年鵲立紅雲龍墀乞得故鄉身風月  
許平分 魏國歸時已老會稽仕日猶貧世間無此錦  
堂春富貴少年人

送周君崇錄判

摸魚兒

澹津橋兩池春水多情偏寫人影冰姿玉質梅花骨誰  
似此君清整秋兔頰似百鍊吳鉤氣挾風霜冷光銍炯  
炯但小試神鋒蛟奔蜃走彭蠡湛千頃 芝山下三世  
甘棠舊境春風重綠相映綬屏畫戟聲華接還羨糾曹

名盛風力勁想御此冷然徑上蓬萊頂城煙楚暝怕別  
後懷人登樓無奈天濶暮江永

送餘干教鄧覺非歸吳

水龍吟

琵琶亭下春波滔滔流入三吳去東風也似無情不約  
木蘭舟住中有仙翁苧衫烏帽筆床談麈道越鄉雖好  
昨非今是終不似歸來賦想見莓苔三尺玉琴清杏  
梢初雨青青衿佩童參冠伍徘徊江暮我意尤長公行  
不顧一聲柔櫓趁輕風徑上蓬萊頂顚去天尺五

顚音頂

顛也

餞張巡檢

百字令

芝山南畔聽將軍鼓角暮煙朝雨渺渺番湖三百里四  
面封疆皆水葭葦烽沉鮮鯢波靜人在漁樵裏封留千  
戶渠家代有人矣正好緩帶輕裘吟詩橫槊五破梅  
花藥誰報萊衣春不待匹馬戴星而起細柳營寒甘棠  
陰在萬口稱才美祥琴何日玉堂直上天咫

代贈醫者葛道夫

水調歌頭

欲問長生藥，勾漏有丹砂。祇今醫國妙手，還屬葛仙家。  
出入神聖工，巧操縱溫涼寒熱功用，妙無涯。談笑起沉  
痼，闔郡萬人誇。又何必神樓散紫荷，車火攻，更是上  
策。一灼補千瑕，使子聲流梁楚，使子名齊和緩。當代更  
誰加金帛，何足報吾筆解生花。

代送路同知罷歸

水調歌頭  
宣城作

兵衛森畫戟，皂蓋映朱轡。平分一郡風月，家世舊衣冠。  
數日春風著物，一夜秋霜滿野，六月宛陵寒。只有雙溪

水照見寸心丹 公好似片雲起敬亭山悠悠漾漾等閒飛去又飛還笑問無心出岫何似從龍天上為雨遍人寰輸與敬亭老趺坐靜中看

祭文


祭徐松巢

昔柳子厚之祭呂化光歐陽公之祭尹師魯皆其平生莫逆之交而言辭吐出其肺腑蓋學莫樂於同好之相求交莫深於知己之相與故鍾子死而伯牙絕其高山

流水之絃郢人亡而匠石輟其聽風斲堊之斧嗚呼巢  
君人中之麟文中之虎金石擊撞雲霧吞吐萬牛不能  
回其翰墨之鋒三峽不足供其清談之塵其蕭散也以  
風月為朋徒其曠達也以天地為逆旅發為詩章用意  
深苦故山村仇公愛君之氣清養吾李公賞君之調古  
他時景文湯訪君於山中如太邱之過朗陵後來南翁  
周詫君于中朝如正平之稱文舉君有美玉匱而弗賈  
寧疏食瓢飲浩然于林泉不以角巾羽扇點污于塵土

雖一世之知音者稀而君亦眼空四海羞碌碌而不數  
雖君之抱負不得展其輪囷而君之文章終不與草木  
而俱腐嗟我與君弱冠相伍七年青燈飽聽松雨聲之  
相應如伯壻而仲麓氣之相合如陽律而陰呂雖人事  
好乖中年多離闊之夢而交情不渝山川無遠近之阻  
初余與君與時齟齬惟芳洲翁以二妙許或者議其即  
且之甘帶鴟鴞之嗜鼠然使其身亨而志污亦勝士之  
所不取前二十年詩筒縷縷二翁招余以早歸結一卷

而遊處余坐於貧竟負斯語奈何古人千里雞黍嗚呼  
君與芳洲逍遙帝所我獨世間能不淒楚嗟故知之已  
空諒久生而何補倘宿緣之未盡尚來世之同侶君能  
飲乎我酒維醺明月西山白雲一塢



鄱陽五家集卷五